



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

**PV Sindhu BAMTC 2025
nung masayatsü**

**Namibia indang mezüngbuba
tir Sam Nujoma süogo**

VOL. XXII ISSUE NO. 117 (ADOK 117)

DIMAPUR

TENTONÜ (MONDAY)

TSÜKLAI (FEBRUARY) 10, 2025

₹ 5.00

Shishilembar shia dak yimya aser tangatetba tajung nüngdaker: Dr. Muru

Dimapur, February 9, 2025 (TYO): Shishilembar shiai tajungba küma onüra yimya tajung benshitsüla aser tangatetba tajung alitsüla ta Confederation of Nagaland Chamber of Commerce and Industry (CNCCI) Chairman Dr. Khekugha Muru-i ashi.

February 8, 2025 nü Phek town hall nung Phek District Chamber of Commerce and Industry (PDCCI) 36 buba general session nung Dr. Muru-i iba tayongzükbaga agütsü.

Shishilembartem dak iba sempet ana melira, tangari temulung malemtsü aser tamang makatsü aser tatem nung shishilembabaren akoksatsü ta Muru-i ashi.

Nagaland nung shishilembartem state sorkar nem GST revenue Rs. 1,300 crore agütsür saka sorkari shishilembartem asoshi meblemtsür aser mapa kecha meinyaker ta pai sasaba olen ka ashi.

Sorkari tang tashi nung shishilembartem atema scheme ka danga magütsüteter ajisüaka shishilembartemibo state sorkar nem Rs. 1300 crore GST revenue agütsüogo. State sorkarisa shishilembartem yaritsü asoshi business advisory board ka metentet lir, ta Dr. Muru-isa metetdaksü.

"Kohima aser Mokochung Municipal Council tem dak alaka tanüngba urban local bodies nung

onoki business community nungi züngsem kaka dendaktsütsü mepishiba ano meinyak lir. Anungji CNCCI-i temeten mangu tashi onoki sorkar den raratsü" ta paisa ashi.

"Naga political groups-i tashiyim agi sen saruba atema CNCCI chairman-isa "özüng alema tax saruba anendaktsütsü atema shishilembartem len anir inyaktsüla kechiyong sorkar mesüra civil society organizations-i iba khuret atema mapa akangkanga meinyakteter" ta Dr. Muru-isa ayongzü.

District balala nung yimdaklirtemi shishilembatsü atema inter-district road connectivity kanga tongtipang lir. Nagaland nung tasütait aser longjema aliba district commerce bodies nung PDCCI ya ka lir, ta paisa shisem.

Iba sentong nung MLA Kuzholuzo Nieniu-ia salem o jembidang nübortemi ochi mangateter aser magizükteter ta ashi.

Nübortemi tajung bilema ashiba magizükteter aser lenisüba tajung magütsüteter ta pai ashi.

"Tanü union mesüra organizations-i ajak ajungtsü atema masü saka pei pei ajangzüksü atema ang inyaker. Naga loktiliba nung factions, organisations aser unions talila akümba ajanga loktiliba alizüng ka yur tejakleni mouteter" ta MLA Neinu-isa ashi.

CM Rio and Dy. CM Patton nati tenüngsang agütsü



Dimapur, February 8, 2025 (Agencies): February 8, 2025 nü BJP-i Delhi Assembly elections nung takok tulu anguba atema Chief Minister Neiphiu Rio aser Deputy Chief Minister Yanthungo Patton nati Bharatiya Janata Party (BJP) aser Prime Minister Narendra Modi nem tenüngsang agütsüogo.

Delhi nung küm 26 tema lir külen BJP-i Aam Aadmi Party (AAP) sorkar atsüngdoktsüsa takok tulu nguteta liasü.

"BJP-i takok anguba atema tenüngsang agütsür, iba election ajanga public-i party mangdang aser lenisüba nung temulung alemba sayur" ta CM Rio-i metetdaksü.

CM Rio-isa Prime Minister Modi aser BJP National President JP Nadda nem tenüngsang agütsü aser iba takok ajanga

terenlok putu tasen ka bentsür arur ta shisem.

"Party züngsemtemi kanga meranga inyakba ajanga otsüsütsüsa takok nguogo. BJP National President JP Nadda, National General Secretary (Organisation) B L Santhosh, aser Delhi BJP President Virend Sachdeva nung lenisüba tajung ajanga iba takok nguogo" ta Deputy CM & BJP Legislature Party Leader Y Patton-i ashi.

PM Modi lenisüba kübok India-i temelenshi tajung ka ajangshidar aser Delhi nung takok ajanga party-i terenlok aser sorkar ketdangsubaren tajung agütsütsü nangzükbaga kuli agütsür ta pai ashi.

"Iba takok ya züngsem shia, pusemer shia aser BJP-i linük yangertsü mission nung amanger voter shia meyong lir" ta Patton-isa ashi.

Manipur nung Biren Singh-i CM menden nungi anener



February 9, 2025 nü Manipur Chief Minister N. Biren Singh-i Governor Ajay Kumar Bhalla ket nung pa mapa nungi anenba shidi agütsüdang agiba noksa ka angur.

Guwahati/Imphal, February 9, 2025 (Agencies): Manipur nung tensa mejungi akümba sülen küm ana lir külen Chief Minister N Biren Singh-i Deobarnü menden nungi sodi agiogo.

Manipur state BJP sasep nung Biren Singh lenisüba anema noktakba songtemtsü mechi nung pai Chief Minister menden nungi sodi agiba shidi zülüogo.

Manipur assembly nung Congress-i no-confidence motion ka benoktsü aser floor test agitsü lenmang aliba ajiteta CM Biren-i tanü nikongdang Manipur Governor Ajay Kumar Bhalla nem pa mapa nungi anenba shidi agüja liasü.

Conrad Sangma'er National Peoples' Party (NPP) MLA temi sorkar nung medenaka assembly nung BJP MLA peria dang lir saka Biren Singh anema noktakba MLA temi floor test nung party whip anema inyaktsü akok.

Iba mapa meinyakdaksütsü mechi nung Chief Minister Biren-i Central leadership den jembiba sülen menden toktsüogo.

Biren Singh tanep Delhi-i ao aser idakji BJP national president JP Nadda aser Union minister Amit Shah na aden ajurutepa liasü.

Nagaland nija mozü kitem nung PM-JAY aser CMHIS anentsü akok

Dimapur, February 9, 2025 (TYO): Nagaland Private Doctors Association (NPDA)-i Nagaland Health Protection Society (NHPS) aser Future Generali Insurance (FGI) dang mepelaba metetdaksüba den parnoki yimjak nung tatok meshitsü takhangba agütsüogo.

NHPS aser FGI-i Empaneled Health Care Providers (EHCPs) den sign sütepa Memorandum of Understanding (MoU) nung

May 2023 nung kin o kin tsüngda rara adokba atema BJP MLA 12-i state nung lenisüba melentsü takhangba agüja arur. Parnok dak alia ano MLA 6 tiyongtsü nung lir ta party osang ajanga angashir.

Manipur Speaker aser Chief Minister tsüngda mangatetep lir ta party osang ajangasa ashir. Biren anema noktakerami Amit Shah den-a ajurutepogo.

Hombar nungi Manipur assembly session tenzüksü aser idangji Congress-i no-confidence motion ka benoktsü osang metetdakja lir.

Maharashtra, Haryana aser Delhi assembly elections nung BJP-i takok tulu nguyonga aruba sülen Manipur teblemtsü ajanga tetsükdaktsü ajurutsü ama central BJP lennirtemi bilemer.

Kuki nunger kati Supreme Court nung oa Chief Minister-i state nung özüng alema inyaktsü ajungmesotsü ta tai tongoktsüba sülen Biren Singh anema ola tuluba adoktsü tenzüka liasü.

Kuki senso yagi Chief Minister Biren indang leaked audio tapes nung ajemdaker ken o benoka liasü.

Non-profit private forensic laboratory Truth Labs-i audio

tapes nung aliba ola ji Biren Singh ola den 93% putepa lir ta jangjatsüogo.

Iba atema Supreme Court-i Central Forensic Science Laboratory dang nungi leaked audio tapes indang osang meshiogo.

Governor Ajay Kumar Bhalla-i Chief Minister den Council of Ministers indang resignation agizükogo saka pai Biren dang state nung tanga inyakyim tenzüka mao tashi caretaker Chief Minister inyaka atatsü mepishiogo.

"Ni Nongthombam Biren Singh-i Manipur chief minister menden nungi anenba shidi zülur. Tang tashi Manipur nung alirtem tenzükbaga ya maongka ka liasü. Centre-i mapang shitak nung yaritepa aruba, terenlok mapatem inyakba aser Manipuri nunger shia kümzüka ayutsü atema mapatong balala inyakba atema ni kanga pelar. Centre sorkari maneni iba mapa tajung inyaka aotsü mepishir" ta CM Biren-i Governor Bhalla dangi züluba shidi nung shia lir.

Biren Singh den külemi BJP MP Sambit Patra, State Ministers aser MLAs-i Raj Bhavan nung Governor den ajurutepa liasü.

February 15, 2025 nungi Ayushman Bharat (PM-JAY) aser CMHIS Services anentsü lemtet agiogo.

Senden nungsa NHPS-i EHCPs tenüng menüksüba atema yimjak nung tatok meshitsü atema takhangba agütsütsü lemtet.

Tarutsü nungbo NPDA nungi temelaba magiii EHCPs-i tenangzüktep tasentem magitsü atema senden nung adenertemisa telemtetba agiogo.

NJA pur 21 General Conference cum farewell sentong agi



Kohima, Tsüklai/February 09 (TYO): Nagaland Judges' Association (NJA) pur 21 General Conference aser Kheshehi Chishi, NJS (Principal Judge, Family court, Dimapur) aser Nino Iralu, NJS (District & Session Judge, Wokha) den tepila sentong Law Guest House, Chümoukedima nung February 8, 2025 nü agia liasü.

Mapa nungi anener ketdangsür temi tepila o jembidang parnoki ajangshibatam lemsatep aser ketdangsür aser staff temi yariba atema pelaba lemsatep aser ano judicial officers dang kati ka yariteptsü ayongzüka liasü.

Sentong nung Mezivolu T. Therieh, NJS, Principal Judge, Family Court, Kohima, Wonchibeni V Patton, NJS, Chief Judicial Magistrate, Peren aser Cheliam Khiamniungan, NJS, Judicial Magistrate first class, Zunheboto nungria o tatsütsü jembia liasü.

Parnoki mapa nungi anisüngzüka ketdangsür temi len aniba aser yariba atema pelaba lemsatep aser tarutsü wadang asoshi moaja liasü.

Mungdang mapang NJA kümsük 2025-27 atema ketdangsür Neiko Akami - President, Phuleto Yeptho - Vice president, Seyielenuo Mezhii - Secretary, Julian Sitlhou

- Joint Secretary aser Cheliam Khiamniungan - Treasurer shima liasü.

Sendong nung Kumdilong Kessen, NJS, Chief Judicial Magistrate, Longleng, NJS & Joint Secretary, NJA menden liasü, Peter Boduve Resu, NJS, Chief Judicial Magistrate, Mon ajanga sentong tenzüka sarasadem aser Victo Sema, Principal District & Session Judge, Mokochung, NJS and President, NJA ajanga tepela o jembia liasü.

Tucuno Vamuzo, District & Session Judge, Mon, NJS and vice president, NJA ajanga melepzüng o jembia sentong tembanga liasü.

Dr. Tatongkala-i züluba kaket sayaogo



Dr. Tatongkala-i züluba "The Hornbill Festival: Culture, Tradition and Identity" kaket Dimapur nung February 8, 2025 nü Abu Metha, Advisor to Chief Minister, Nagaland and Chairman of Investments and Development Authority of Nagaland (IDAN) ajangasayatsüdang tangokba noksa nung angur.

Dimapur, Tsüklai/February 09 (TYO): Dr. Tatongkala-i züluba "The Hornbill Festival: Culture, Tradition and Identity" kaket Dimapur nung February 8, 2025 nü Abu Metha, Advisor to Chief Minister, Nagaland, and Chairman of Investments and Development Authority of Nagaland (IDAN) ajanga sayatsü.

Iba kaket sayaba sentong nung Dr. Nouzhienino Peseyie, HoD, Department of Psychology, Tetso College menden liasü, kong Longkhum Senso Telongjem Dimapur, Longkhum Kaketshir Telongjem Dimapur, Longjang Senso Telongjem Dimapur, aser Longjang Kaketshir

Telongjem Dimapur nungi lenirtem dena liasü.

Iba kaket ya Heritage Publishing House ajanga menüng, kong Hornbill Festival dak sendakba Naga Identity indang 'cultural spectacle' aser 'cultural politics' tejanga asadanga zülua lir.

Kaket adoktsür Dr. Lanusangla Tzudir, Chief Editor, Heritage Publishing House ajanga sentong nung jembidang, iba kaket ya Hornbill Festival indang academic research mapa mezüngbuba lir ta ashi.

Alakteta jaoker Abu Metha-i kaket zülur nem tenüngsang agütsü aser kaket adoktsüri la yaria la dak amangba asoshi

pelaba ashi.

Iba amala kaket kanga junga research agir züluba atema pai kaket zülur nem tenüngsang agütsü aser küm shia Kisama nung agiba Hornbill Festival indang tongmelang agi rateta ashi aser iba benjongmung ajanga Nagaland nung temelenshi balala bener aruba indang shia liasü.

"Hornbill Festival ya Naga nunger ayak tali jangjatsü lenmang ka lir," ta pai ashi.

Metha-i ashiba agi, iba benjongmung ya kanga nüngtugu lir aser Naga nunger indang "intellectual property" tejanga lir.

Iba kaket yagi otsü tasen agütsütsü, angazükdaktsütsü aser kishi tasen lapoktsü imlar ta pai ashi. Paisa Naga nunger dang asen, asen nübur aser asen li asoshi zülutsü aser jembitsü ayongzü.

Dr. Tatongkala-i la indang kaket mezüngbuba indang jembidang, küm aika research agiba sülen iba kaket ya renem aser iba mapang tayongzüka aser tajangzüka liasü.

"Hornbill Festival ya kangabo research magir, anungji iba kaket ya research agirtem aser scholar temi amshitsü aser sobaliba tsütsü awareness agütsüba aser asen sobaliba wazüka ayuba nung yarisemtsü imlar," ta lai ashi.

Iba kaket meshiteta Pastor Imnatoshi Longkumer, DABA ajanga sarasadem aser Longjanglar Telongjem Dimapur ajanga tenüngsang agüja liasü.

Dr. Tatongkala ya Tetso College indang Department of History nung Assistant Professor lir.

Churachandpur nung opium seret 25 apu

Imphal, Tsüklai/February 09 (Agencies): Myanmar den arütsü aliba Manipur state kübok Churachandpur district south tsütsü poppy plants aika raksa indoktsü.

Honibarnü iba district nung Sangaiko police station kübok G Monglian village tenem kong nung operation agidang poppy pods ter apu.

District Magistrate, Churachandpur District tenük kuli lia G. Monglian village hill range under Sangaikot-PS, Churachandpur District nung poppy cultivation ya security forces aser Forest Department ajanga raksa indoktsü, ta ketdangsürtem sangdong ka

ajanga ashi.

Iba mapang poppy plants ya ali acres 5 shi nung tsünüa aliba raksatsü aser kuli ama Poppy pods ter apu. Iba tesem nungi opium seret 25 shi agizüksüba liasü.

Iba inyakyim nung nisung kata mapu, saka police temi ken o benoka bushisingdangtsü ta ashi.

Churachandpur nungsa January 15, 2025 nü Haopi Mollen yimtsüng nung Assam Rifles, Manipur police, Narcotics and Affairs of Border (NAB) aser District Forest ketdangsür temi ali acres 4.8 shi nung poppy tsünüa aliba raksa indokja liasü.

Arunachal Pradesh Nimok Pung ya tourism tesem kumdaktsüner



Itanagar, Tsüklai/February 09 (Agencies): Arunachal Pradesh anüdoklen Nimok Pung ta ajaba 'saltwater well' ya Tirap district kübok Subang yimtsüng nung tenemkong ka nung lir.

Iba tzübo nung aliba tzü ya metsü amai aser yangji alirtemi ashiba agi, tesüiba mapang kabo Arunachal Pradesh tuluba aser Assam anüdoklen alirtemi iba tzü nungi metsü agizüka amshi.

Akhi alemli oset-tsüset melentepba putu nung Arunachal Pradesh nungi yimdaklir temi dal aser totzü amala den melenteptsü atema

metsü ya bener arua liasü.

Forest Minister Wanki Lowang-i anir mera balala agiaka yimdaklir temi sorkar dang iba tesem nung tourism ajungkettsü asoshi teti atema mera agitsü ajungshir.

"Nimok Pung ya tourist tesem ka kumdaktsütsü asoshi sorkar dang ajungshir. Otsüla-oboula nungri iba tzübo nung adokba metsü ya amshi aser iba tsübo nungi adokba metsü tzü ya amshira tashidak kecha agia na mesüra ner kibong nung mokongshitsü ta amanger," ta Subang yimtsüng nungi lenir kati ashi.

Myanmar nungertem tali Manipur-i senoka aiter

Imphal, Tsüklai/February 9 (Agencies): Myanmar nung azütokshi lendong tesashiba küma aoba mapang ka nung Myanmar nungertem ano aika tejenok dak bushia Manipur kübok Tengenoupal district-i aitogo.

Ketdangsürtemi ashiba agi, Myanmar nung aliba Naga nunger 230, kong Anal nunger 180 aser Tangkhul nunger 50 densema lir, parnok arrtsü adena India litsüi aita Tengenoupal district kübok Thangbu Meenou yimtsüng nung jenoka lir.

Myanmar nung military lenirtemi Myanmar nung aliba Naga nungertem dang khen atema teküzmükba tesem bushia oa jenoka atatsü asoshi tetuyuba agütsüba sülen nisung aika arrtsü adena jena aruogo.

Myanmar military junta den rara aliba People's Defence Force anema asendenshir military-i jenjang agiba mapang ka nung tang iba tetuyuba agütsüogo.

Iba tatalokba dak sendakba nung Manipur Water Resources Minister Awangbow Newmai-i anir Naga nunger legislator pongui Chief Minister N Biren Singh den Hokolbar aonung ajurutepogo.

Singh-i, kidanger linük nung rara adoker aliba apir, Myanmar nungertem nem tejenokdak agütsüogo ta ashi.

Myanmar nung mepetmesü tulu adoker aliba ajanga Myanmar nunger aika pei talidak ki toktsür jenshia odor aser parnok ya India kübok Manipur aser Mizoram state nung aika jenoka lir.

BJP nem parnoki nangzükba ajak inyakdaksütsü: Atishi



February 09, 2025 nü AAP lenir Atishi-i Delhi Lt. Governor VK Saxena nem Chief Minister menden nungi anenba shidi agütsüadang tangokba noksa nung angur.

New Delhi, Tsüklai/February 09 (Agencies): Delhi assembly election nung AAP-i tamakok anguba sülen anogo ka lir Amongnü AAP tongti lenir, Arvind Kejriwal-i takok anguba party MLA tem ayongdena senden ka amen.

Senden nungji Kejriwal-i party MLA tem dang nüburtem atema maneni inyaksü ayongzük.

Menden 70 aliba Delhi assembly election nung BJP-i menden 48 nung takok angur aser tanungba menden 22 nungji AAP-i takok ngua liasü.

Senden tembangba sülen osangbenertem den jembidang chief minister menden nungi anentsü alila Atishi-i, party-i assembly nung opposition shilem tajung agitsü aser BJP-i election mapang nung nangzükbatem inyakdaksütsü, ta metetdaksü.

"Kejriwal-i tang tasenpur MLA tem dang nüburtem tenzüksü aser timtem onüktem bentettsütsü atema inyakang ta shiogo," ta Atishi-i metetdaksü.

"AAP-i opposition shilem tajung agitsü aser BJP-i nangzükba ama March 8 tashi nungbo tetsür shia nem ita shia sen 2,500 agütsüdaksütsü, electricity unit 300 angati agütsüdaksütsü aser nüburtem nem facilities maneni agütsüdaksütsü," ta lai ashi.

Tesüiba küm 10 tashi AAP sorkari nüburtem nem angati service aser facilities agüja aruba maneni agütsüdaksütsü

atema MLA temi BJP rongshitsü, ta lai ashi.

Taruba anogotem nung AAP legislative party senden nung opposition lenir shimtsü, ta lai ashi.

Amongnü Delhi Chief Minister Atishi-i CM nungi anenba shidi Delhi Lt Governor, VK Saxena nem agütsüogo. Ajioda Lt Governor VK Saxena-i la dang sorkar tasen maküm tashi maneni chief minister inyaka atatsü mepishiogo.

Tawa election nung Atishi-i Kalkaji menden nungi maneni takok ngua liasü.

Ato kilonser, Narendra Modi-i US semdangtsü, aser pa US nungi meyipa aruba sülen BJP-i sorkar akümtsü atema asüngdangtsü, ta BJP lenirtemi metetdaksü.

Raj Niwas-i sangdong ka ajanga, "Tanü Lt Governor, VK Saxena-i Chief Minister Atishi ket nungi menden nungi anenba shidi agizükogo. Pai la dang sorkar tasen maküm tashi maneni chief minister inyaka atatsü asüngdang," ta metetdaksü.

Delhi LG-i February 8 nungi Delhi Assembly anentsüogo.

Anogo ka jakdang assembly secretariat-i sangdong ka ajanga, "Government of National Capital Territory of Delhi Act, 1991 nung subsection (2)(b) of section 6 ajanga agütsüba tashi amshia ni, Vinai Kumar Saxena,

Lieutenant Governor of Delhi-i NCT of Delhi nung February 8 anogo nungi Seventh Legislative Assembly anentsür," ta metetdaksü liasü.

Yaküm AAP tongti lenir Arvind Kejriwal-i Chief Minister menden nungi anenba sülen September ita nung Atishi-i chief minister tenangzükba agia liasü.

Amongnü AAP otongdar, Priyanka Kakkar-ia, Delhi nung party opposition shilem tajung agitsü, ta metetdaksüogo.

"Nüburtem teletmetbaji onoki ajemalua agizüker. AAP ya metokmepri/aibelen angatetba, metetba aser metongshiba party ka lir. Onok vote shilem ajemba kuliji onoki bushitsü," ta party otongdarisa metetdaksü.

"Onoki opposition shilem tajung agitsü aser BJP-i election mapang nung Delhi nung aliba nüburtem dang nangzükba ajak onoki inyakdaksütsü," ta otongdarisa metetdaksü.

Delhi election jakdang BJP-i manifesto nung tenangzükba aika nangzuka liasü. BJP-i Matru Suraksha Vandana scheme kübok mashisa tetsürtem nem nutrition kits 6 agütsütsü aser sen 21,000 agütsütsü nangzuka lir.

Sensaker tetsürtem nem cylinder sen 500 agi agütsütsü aser Holi & Diwali benjungtem nung gas cylinder kaka angati agütsütsü; Mahila Samridhi Yojana kübok Delhi nung tetsür shia nem ita shia sen 2,500 agütsütsü aser Atal Canteens nung Delhi kübok slum nung alirtem nem chiyungtsü sen 5 agi dang agütsütsü. Arrshi küm 60 nungi 70 tsüngdapurtem nem pension 2,000 agüja aliba nungi sen 2,500 kümtsütsü aser arrshi küm 70 ser temapur teintet sensotem, amitsürtem aser meshimejunger tetsürtem nem sen 2,500 agüja aliba nungi sen 3,000 kümtsütsü, ta manifesto nung nangzuka lir.

Delhi nung Ayushman Bharat scheme benoktsü aser Delhi sorkar nungia teyari sen lakh 5 tali agütsüsemtsü. Delhi nung alirtem nem Ayushman Bharat scheme kübok health cover sen lakh 10 tashi agütsütsü, ta parnokisa nangzuka lir.

BJP MLA 16 aser AAP MLA 15 anema ken o benoka lir

New Delhi, February 09 (Agencies): Tawa Delhi assembly election nung takok angur MLA tasen 70 nungi parnok 31 anemabo ozüng alema inyakba ken o balala benoka lir, ta ADR-i metetdaksü.

Taoba Delhi assembly nunga ozüng alema inyakba ken o benoka aliba MLA 43 liasü.

Association for Democratic Reforms (ADR) aser Delhi Election Watch-i Delhi nung candidate 699-i agütsüba affidavit nungi item osang asadanga liasü.

Takok angur candidate tem anema ozüng alema inyakba ken otem benoka aliba ya tebilemtsü onük ka lir, ta ADR-i metetdaksü.

Delhi nung tang tasenpur MLA 17 anemabo ozüng alema inyakba ken o tamajung benoka lir; item ken o rongnung nisung tepsettsü merangba aser tetsürtem anema inyakba ken otem densema lir, ta ADR-i metetdaksü.

Tawa Delhi election nung takok angur candidate kati, nisung tepsettsü merangba ken o pa anema benoka lir ta affidavit nung shia lir aser candidate anati tetsürtem anema inyakba ken o tena anema benoka aliba affidavit nung shia lir.

Party tem sasep nung, tawa

takok angur BJP MLA 48 nungi 16 anema ken o benoka lir aser takok angur AAP MLA 22 nungi 15 anema ken o benoka lir.

BJP nungi MLA tenet aser AAP nungi MLA 10 anema ken o tamajung benoka lir.

Tang tasenpur MLA 70 ket nung rongsen ajak senteper sen crore 1,542 lir aser ibaji lemtsüra MLA shia ket nung rongsen sen crore metsür-anana (crore 22) lir.

BJP MLA tem shia ket nung average rongsenji sen crore 28.59 lir aser AAP MLA tem shia ket nung sen crore 7.74 lir.

BJP candidate asem ket nungbo sen crore 115 nungi crore 259 tashi lir aser AAP nungi MLA asem ket nungbo rongsenji sen lakh 20 tekübok dang lir.

BJP MLA tem rongnung takartiba asemji Karnail Singh (sen crore 259.67 jenjang rongsen), Manjinder Singh Sirsa (sen crore 248.85) aser Verma (sen crore 115.63) nunger lir.

Tang MLA tasenpur shilem 64 graduate degrees aser iba dang temaba degree lir, MLA tem shilem 33 Class 5 nungi Class 12 tashi azüngertem lir.

MLA tem shilem 67 arrshi küm 41 nungi 60 tsüngdapurtem lir aser MLA tem shilem 20 arrshi küm 60 ser temapurtem lir.

2020 küm Delhi Assembly nung tetsür MLA 8 liasü saka tangbo tetsür MLA 5 dang kümogo.



February 09, 2025 nü Kerala yimtiba, Thiruvananthapuram nung Mathrubhumi International Festival of Letters (MBIFL 2025) sentong nung Telangana Chief Minister, Revanth Reddy-i 'One Nation One Election' onük jembidang tangokba noksa nung angur.

Maoists 31 aser sepai ana asü

Raipur, February 09 (Agencies): Amongnü Chhattisgarh state kübok Bijapur district nung Maoists telungpurtem den raradang security sepaitemi Maoists telungur 31 khasetogo, ta police ketdangsertemi metetdaksü.

Telungpurtem den khatetpdang sepai-a ana asü aser ana yiru.

Amongnü anepdang züngia Indravati National Park area kübok arem nung security sepaitem longjemer Maoists telungpurtem mita aodang telungpurtem ajurua khatet.

Bastar Range nung Inspector General of Police, Sundarraaj P-i, Maoists telungpur 31 khasetogo aser raraba tesem nungjagi

prangpong aser tapoktsü aika nguogo, ta ashi.

Kasa rara nungji security sepai anata asü. Sepai anaji ka state police District Reserve Guard nungi aser ka Special Task Force nungi liasü.

Iba rara nungsa sepai ana yirua tayimtsü ajanga medical facility kati anir ao.

Iba tesem jagi security sepaitem tali yoksemogo aser maneni telungpurtem mita odar, ta paisa metetdaksü.

Taküm küm tenzüker tang tashi nung Chhattisgarh state nung Maoists telungpurtem 81 khasetogo aser parnok 65 bo Bastar division kija nung khasetba lir.

Yaküm-a Chhattisgarh state nung sepaitemi Maoists telungpur 219 khaset.



February 09, 2025 nü Jabalpur nung tetsürtemi 'Saree Walkathon' awareness sentong nung shilem agidang tangokba noksa nung angur. February 11 nü International Day of Women & Girls in Science anogomong amongtsü jelia parnoki iba sentong agi.



TIR YIMYIM YIMOBILEM (EDITORIAL)

DIMAPUR TENTONÜ, FEBRUARY (TSÜKLAI) 10, 2025

Mozü masü tashidak ayoker !

Nagaland nung, talisa Dimapur aser Chümoukedima district nung taoba küm ishika tsüngda mozü ayokdak 'pharmacy' zünger mezüngma lapokyonga aoba ngua, tang menur asüyonga Nagaland Medical deparment-i mityonga aoba mapa yagi nisung aika memeteti tashidak aika nungi jenbutsü aser tasü nungi kümzüksü imlar. Atangji, yimti nung mozü ayokdak 'Pharmacy' aika lapokyonga aobaji nübortem asoshi tajung, kechiyong shirangba mapang, mapang aser senotsü talila meindoki jet ta anameta mozü alitsü akoktsü. Ajisüaka, shisabolutsü kaji mozü ayokdak karbo, ashiko, temelaba magii lapokba alitsüa akok mesüra mozü ayoktsü atema temelaba aliyonga mozü ayokertemji mozümora ayoktsüsa metetba tazünger masütsüa akok, anungji item jagi mozü aibelena agütsüra shirangertem ajungtsüabajibo yutsür mozü meshitak achiba ajanga tanga tashidakang bendenloka temang tamajungba akümtsü ana nung lir. Ano, iba shisaboluji dang masü saka nübortem asoshi takoksa aser lendong tulutibaji mozü shitakbala masü saka taila mozü ayokba ajanga ataloktsü ana nung lir. Tanü putu nübortem asoshi tajung kaji mozü jenjangtem ya tasakbo masü, iba jagi maneptettsüba tashidak ka mesüra sensakertemia mozübo aliteter. Aji oda, Covid ama tashidak wara tuluka mepoktetra, Nagaland ama nütsüng nebo aika malidak mozü ayokdak tajangzük angutsüsa mozü ayoktsübaji tebilemtsü tulu lir. Ajisüaka, kinükkisang ajak nung mozü ayokdak pharmacy lapokyonga aobaji bilemdangra, odangbo masü, item mozü ayokdakji mozü taila ayoker asü mesüra tajangzük talila angutsüsa ozüangi memelaba mozütem ayokerang ka asütsü. Atangji, yimti nung jakdaka mozü ayokdak lapokbaji kenyongi government nungi temelaba magii lapokbabo masütsü, anungji mozü ayokdak paikaya lapokyonga aotsüsa temelaba agütsüba yimya nunga temulung malemtsüsa adoker. Aji oda, mozü ayoktsü atema temelaba agütsüba kuli ya Naga nung lanurtem medical mesüra pharmacist zünger mapa mengui alirtem nem agütsür asü mesüra temeshir ajunga nem agütsür ta asüba kuli bushitepa kümdangshitsü nüngdak ka reprangteter. Nagaland nung mapa ajak tsümartemi inyaker, anungji mozü ayokba mapatema teimbaka, tenüngbo Naga nung saka shitak teinyakertembo tsümartem mena angutsü. Item tsümartemjia teimba ka mozü shitak metetba tazünger nisung masü saka mozü ayokdak yaritepa inyakdang mozü tenüngtem tera angazüka inyakertem dang asütsü. Item dangji asenoki tapi agi mozü asüngdanga alia achir. Ano, asenok asoshi lendong kaji asenoki aiben kodamasüka meshirangra, temang tendangdaksütsü asoshi doctor bushia maor, anungji doctor teyari magii asenoki asenoksasa tapi agi mozü alir. Iba ama doctor tezüluba melii mozü alidang mozü ayokdak nungi mozü tai agütsütsüa akok mesüra yoknüba apia menüngdakba mozü dena tali agütsütsüa akok. Item jagi asenok doctor ajurua mozü shitak züludaktsür alitsüba dang nungi teimba senotsüa endoktsüsa timtem ajurur. Item ajakji, tanga timtem agi masü saka state nung government inyakyim kecha shitak maliba ajanga lir. Aji oda, government inyakyim shitak alinungbo, tamasayongi, temelaba shitak melii mozü ayokdak malapoktsü aser mozü meteter mali ser mozü mayoktsü. Ibai tesümgangtsüka lir, kechiyong Nagaland nung medical department nung inyakertem aser parnok kinungertembo meshirangtsü ta masü, anungji parnoka shirang nungbo, ashiko, mozü ayokdakji mozü meshitak mesüra mozü taila alishitsüa akok. Item lendong ajurutsüba mapa aser mapang meteta government nung nübortem taküm anema lidaktsütsü asoshi inyakertemi balaka, pei mapa nung ochishia aser nendaka inyaktsü kanga nüngdaker. Aji oda, tanü Nagaland nung mozü ayokdak mozü masü saka tashidak ayoker ama kümdaktsüba mapatem ya government-i nübortem taküm mapayui inyakba mapa ka asütsü. Item yabo asenokia nokdangtetsüla.

OLEMSABANG

AJAK PEI NÜNGTEM CHICHIBA NUNG LIDI

~ Molungkimong Literature Board

Yashi adok nungi...

"Aor zülumen den meputep parnoki züluba onoki rateta majiteter" ('Na-a Liang Tangar-a Lidakjang'). Molungkimong Literature Board-i züluba 'rateta majiteter' ta asüba jibo khen tokja atar, saka shiba südir süaka, kija takum kati (individual) Aor zülumen kibur kuma jembiba yabo tsürema bilemtsür. Ano iba ocet nung sa, "I went with them" ta Dr. Clark teka agi zülubaji "onok külemi ao" ta jibo masü aser aji English angateter ajaki meteta lir. Anungji yangi tazüngertemi asungdangtsübaji, 'Dr. Clark-i "I went with them" ta zülü nung, kechiba "Clark-i anir ao" mesüra "onok külemi ao" ta meyipzüka benshir?' Meteta yur oshi meshidak meyipzüka (translation) aser meteta yur meshidak ratetba (interpretation) ajiteter. Anungji otsü tasen zülutsü merangba den miim taginüba kar lir ta ajiteter.

Molungkimong tebu-teti-i, Yimsen akümtsü temelaba agütsü ta zülua angur ('Na-a Liang Tangar-a Lidakjang'). Iba nungya ken-o tulu keta lir. Molungkimong tebu-teti-i yimsen akümtsü temelaba magütsü. Temelaba shiri agütsü/magutsü indang metetnera item nungya jangja-a angutsü - Mary Mead. A corner in India, p. 22, 23; Tsüngrem Nukrang: Chungtia Baptist Arogo Centenary Souvenir tapu 3; A. Olem Kilep. Laishir Mungchen, page 50.

"Limapur-i Sü ajibaji tim tang" ('Na-a Liang Tangar-a Lidakjang') ta ashibaji onokia hau asür saka onoki ashibayabo, tamangeri (Arogo Züngsem) Sü ajiba indang ashirba.

Ano "1898 küm Ao Mongdang Impur nung sentep dang Arogo terok tang liasü" ('Na-a Liang Tangar-a Lidakjang') ta zülua lir aser ya 'ABAM Küm Tatem Mungdang Tezülubatam 1897-1971' kaket nungi refer asüba. Saka yangi iba ken-o matem. 1898 ABAM Ao Mongdang sülen, Ao lima arogo otsü nung temelenshi aser research tajungba agia telemtetba nung temelenshi balala agia aru. Tatishitsü agi, mapang talangka Molungkimong nungi tamanger ajak aoji Arogo okshia sama, ta jembia/zülua aru. Saka, 24th October 1876 anogo yim tasen akumi aodang tamanger 6 dena kibong 15 dang ao. Aser, Repalemba 1919 küm Pastor aser Tesayur repa inyaktsü Rev. Longwell-i Impur nungi Molungkimong-i yokba pa Molungkimong-i aludang tamangertemi Deobarnü among monga liasü ta ashiba kuli o (document) lir. Yamaji, 'ABAM 1980 Resolution No 42' ajanga Molungkimong Arogo Metangdangi aruba aser Centenary 1972 küm amongbaji tim ta agizüka ayu. Saka, Molungyimsen Arogo aser Yimden ajanga par yimja-yimkum nung kongshiogo anungji okadaki aotsü ta amokmerenba ajanga ano 1981 küm ABAM Special Committee ka shima 1986 mungdang-i report bener aru. Committee Report agizüka ayu saka iba nungji Mungdang-i shilem magitsü lemtet. Sakasa 'ABAM 1986 Resolution 40 nung-a Molungkimong arogo 1872 nung tenzüka zülua lir. Ano ABAM Sentilong kaket (1997, p. 62) nungjibo 1898 küm Arogo terana (12) tenzüker liasü ta zülua lir. Iba ya pei Arogo-i tenzüka küm pei sasa zülur ABAM dangi yokba Record bendener adokba lir. Iba sülen, asen tenüki ngua ABAM telemtetba balala nung Molungkimong nung mezüng Ao Naga Arogo ji tenzüka ta asüba nenshia telemtetba zülua lir.

Anungji Ao lima Arogo otsüren nung ABAM ajanga research aser lemtet balala agia aruba nungi pei jungji 1898 ABAM Mungdang küm tatem record ka agiteta refer asüba jagi Ao Arogo liyonga aruba otsü nung tebenja adokdaksür. Kechikomaka atepshitep yonga ABAM, NBCC aser BIM - Mezüng Arogo Molungkimong nung tenzüka aser Sesquicentenary 2022 nung amongba ji shidak ta asüba nung nokdaka lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Florida nung Pastor Bill Curl kinüngtsü, Lucy Pat Curl tepset



Pastor Bill Curl aser pa kinüngtsü Lucy Curl na noksa nung angur.

February 09, 2025: Florida nung nisung kati mapang talangka pastor inyaksang, Pastor Bill Curl'er ki amakdang pastor kinüngtsü dak kanga mejungi azük.

First Baptist Orlando Church-i sangdong ka ajanga, nisungba jagi pastor kinüngtsü, Lucy Pat Curl dak kanga mejungi azükba sülen anogo ishika tsüngda la süadok, ta metetdaksü.

Arogoi, "Mapang talangka First Orlando Arogo nung Pastor inyaksang, Bill Curl kinüngtsü Lucy Curl taoba Hokolbarnü kanga mejungi yiruba sülen tanep süogo. Asen Kümtetdakba matsüngdang tangbo la taneptsü nguogo," ta metetdaksü.

Arrshi küm 55, Ronald Davis-i pa 'community service officer' ka ta tiyazü shia pastor Curl'er kidangi ayaketa atu.

Orlando Police Department-i ashiba agi,

Davis-i pongdang ka amshia Curl süchia mao tashi tekolak nung koa liasü.

Police den jembidang Curl-i, "Ni süchia ao aser ni shia aruba mapang nung ozü ki ajak bensatsür liasü. Kü meyong phone-a sama. Ni kidang nungi ayazüka aluba sülen kiyonger teyari meshitsü atema gari horn agütsü, saka shinga maru," ta metetdaksü.

Arrshi küm 85, Curl iba sülenji kidangi tanaben meyipa atu aser la kinüngbu kidangi shilangba ata-a liasü.

La kinüngbu shilangba sülen la Orlando Regional Medical Center-i anir ao. Tekolok nungi azü ayimba agi la nem mozü agüja 'coma' nung yutsü. La kanga tain asüba ajanga tekolok surgery agitsüji tamakoktsü liasü.

First Baptist Church nung tongti pastor, David Uth-i pastor Curl'er kibong nung atalokba osangji Tenla

kidang metetdakja liasü.

Pastor Bill Curl aser pa kinüngtsü Lucy nati küm 50 dak tali pastoral team nung inyakba sülen International Mission Board nungi küm 18 tashi missionary inyaka liasü. Iba sülen tena tanaben America-i meyipa aru.

Pastor Uth-i Arogo nung züngsemtem dang la taneptsü angutsü atema sarasademjang ta mepishia metetdaksü, ajisüaka anogo ishika dang lirbo la süadok.

"Mongolbarnü Lucy dak nungi 'life support' agiena liasü. Tanep yakta la kodaki ogo. Joko la temang nung timtem tekangshi maliba atema pelar," ta Arogoi metetdaksü.

Pastor Bill Curl-i, "Ni aibelensang dang tai atoktsü. Pai inyakba mapang ajanga kü melungsentsü memelenshidaktsütsü. Ni nenok danga kasaji inyakang ta ajungshir," ta ashi.

Pastor Uth-i, "Pastor ki amakba sülen mapang tatsüka tsüngda aibelensangji puogo. Paji ki malir ka liasü. Pa arrshi küm 55 aser küm 40 bo pa tepuokdak liasü. Pa tepuokdak nungi chiokba sülen ita trok dang liasü. Mapang shia pai ki kakkoka atur aser nisungtem dak azüker," ta metetdaksü.

Lucy Curl nem akhüm agütsüba sentongji February 16 nikongdang 4:00 ako nungi First Baptist Church nung agitsü.

ANOGO ABEN TSÜNGREM DEN TEMALEN RANGLOKER JAJANG

Nenok Khrista den meso süra, ajangla Tsüngrem tajichilen kong Khrista mena lir, temalen aliba osettem bushiang. Alima nung aliba osettem nung masü, temalen aliba osettem nung nenok temulung yuang. ~Kolosi 3:1-2

Tanü azüngtsü agüja aliba Lai ajanga Khristan taküm ka koma alits? tim aji asenok nem bilemtetdaksür. Asenok taküm wadang balala inyaka arudang anogoshia asenoki Tsüngremer sentsüwangshi khonang metongteter. Alima nung ken asoshi aliba osettem, mesüra alima jangratem arishidang tamanger taküm shia meteta aser memeteti Tsüngrem tsüngdang aibelenadoker.

Saka Tsüngrem Oi ashir, item alima osettem ken asoshi dang kechiyong kenü item ajak alima nungi samaa oadoktsü. Anungji, amangbapur taküm shia temalen aliba osettem dak rangloker tamang tongpang tajung rarar ka ka astütsü koda tongtipang lir. Kodang asenoki temalen aliba oset dak ranglokdir Tsüngrem tesünep kobai tangatetba ajak atentanger ajagi asenok temulung aser tebilemba ajak teti nüka alitsü Tsüngremer tenangzükba lir.

Temeimbatem, alimai agütsüba osettem nung kecha tajangzük maka aser aji teti asoshi masü. Saka, Tsüngremer tenangzükaba koba lir aji teti asoshi. Anungji temalen rangloker jajaba taküm ka ka asütsü tamanger shia nükjidong südi. Amen

Taoba Miss Nagaland Sachu-i Noklak Town Ao Arogo semdang



Taoba Miss Nagaland 2019 Vikuonuo Sachu-i (tiyong) Noklak Town Ao Baptist Fellowship semdangdang Arogo tenzüker kar den tangokba noksa nung angur.

Vatican nungi ketdangser kati India nunger Khristantem semdang



Archbishop Leopoldo Girelli-i Odisha semdangba mapang tangokba noksa nung angur.

February 09, 2025: Vatican nungi tongti ketdangser kati 2008 küm Khristantem amakdang takoksa angurtem semdang; küm 15 tejaklen Odisha state state kübok Kandhamal district nung Khristantem meyong ki noklang aika rongdoktsü, Khristantem teimba ser nisung 100 shi tepset aser nisung 50,000 shi jenshia liasü.

Vatican ambassador to India, Archbishop Leopoldo Girelli-i January 31, 2025 anogo nung 2008 küm Hindu nungertemi amakba lendong

nungi jenbur Khristantem semdang.

Odisha kübok Raikia nung aliba Our Lady of Charity Arogo nung tekülem sentong nung nisung 1500 shi den jembidang Girelli-i, "Nenoki timtem tekangshi-a aremzüktetba Khristantem million aika dang tatishitsü tajung sayuogo," ta ashi.

Iba tekülem sentong nungji putirtema 30 shi dena liasü.

Kandhamal district nung Khristantem aser akhidang amanger Khristantem medemdang pai, Khristantemi

reshikangshi ajangshiba mapang nung temeim, teimla aser tamang nung rangloker aremzüksüla, ta ayongzük.

Odisha state nung mejangjaba nisung kari Hindu nunger lenir, Swami Lakshmanananda tepsetba sülen pa tepsetba atema tiyazü nung Khristantem nem tai tonglokja Khristantem anema apusoa liasü.

Tesülen ang Swami tepsetbaji Khristantemi masü saka Maoists telungpurtemi tepset, ta kuli jangjaa liasü.

Kandhamal district tiyongtsü ser ita pezü shi Khristantem anema apusodang Tenla ki 300 shi rongdoktsü, ki 600 shi rongdoktsü, nisung 100 shi asü aser aika aremi jena oa liasü.

Raikia nung aliba Vijay High School nung Archbishop Girelli agizüka liasü.

2008 kümji Tiangia yim nunga Khristan tenet tepseta liasü. Iba yimdakji Archbishop-i Martyrs' Memorial semdanga asürtem nem akhüm agütsü.

Archbishop-isa Nandagiri yim semdanga Khristan kibong 82 ajurua liasü.

Noklak, Tsüklai/February 09 (TYO): Taoba mapang Miss Nagaland 2019 Vikuonuo Sachu-i Noklak Town Ao Baptist Fellowship semdang aser lai la taküm kuli lemsatapa tekülemi arur amangbapurtem ayongzüka liasü.

Vikuonuo Sachu-i lai la nükjidong "Beauty with Purpose" nung ajemdaker Noklak Town nung "The Miraculum Society", Nagaland ta nüngja jateta 2021 küm tenzüker aser idakji "Creative Children's Friendship Centre" sentong nung tanur aser tetsür teyari maparen aser sentong balala agidar.

Iba Centre nungji lanurtem asoshi pei sasa aayanga chiyungtetsü tesayuba agütsür aser idakji Library nung kaket züngdaktsür, computer lab nung tangazükba agütsür aser iba denji külemi kaketshirtem nem angati tuition agütsür; tongtibangsa iba dak alaka temesepba mozü achirtem asoshi teyari sentong balala mapang shia agir.

AO OSHI ANGAZÜKDAK:**TANÜ ANGAZÜKTSÜBA OJANG**

Tejaktang

(adj) mezüngen, yakbanglen, tamalen (front side, ahead)

* Lokti senden nung tejaktang taintem mendaktsür.

Tejakra

(adj) sentsü tali, tali jangja (extremely bright and colourful)

*Nisung aikati tejakra süoshi maginer.



Tir Yimyim

OLONG PAITEP # 7060

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzük asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjiong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7059 TELANGZÜBA**TIPIEN :**

1. Taa, 3. Teküm, 6. Aibelen,
7. Aut, 9. Ajizük, 10. Ojala,
11. Semer, 13. Sen,
15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü,
4. Kua, 5. Mitsütsü,
6. Azübenshi, 8. Lah, 9. Jangkok,
12. Akok, 14. Nashi, 16. Sür.

NAI-A YA METETTER MA

Srinagar nungi Rutba Showkat-i Guinness World Record ka yangluogo aser iba ya ghonda ka nung Origami paper boats 250 yanglutetba atema lir. Rutba ya national-level martial arts player ka lir aser lai gold dena medals 60 nguteta lir. La ya calligraphy aser painting nung sempet aketba tetsür ka lir.

Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tripura nung five-star heritage hotel ka yanglutsü: CM Saha

Pushbant Palace, Tripura

Agartala, February 9, 2025

(Agencies): Tripura nung heritage five-star hotel ka yanglutsü aser iba ajanga tourism sector jenjang tajungba akümtsü ta Chief Minister Manik Saha-i ashi.

State Engineers' Association (SEA)-i ayongzüba sentong ka nung CM Saha-i Tata Group

den luxury hotel ka yanglutsü olemtepba osang lemsatep.

"Iba mapa ajanga Tripura melenshitsu kechiyong hotel nung royal rooms dang masü saka ainertem atema exclusive rooms yanglutsü. Iba ajanga foreign tourists-i state semdangi arutsü aser Tata Group-i alima jenjang nung mapa inyakba

ajanga ainertem atsür arutsü" ta CM Saha-i ashi.

Tripura semdangi arurtem hotel nung dang amongba masü saka Rudrasagar, Unakoti archaeological site, Chhabimura, aser Dumber Lake sema senzütetsü.

Iba mapatong ajanga state nung nisung 200 shi direct employment maongka angutsü.

State sorkari chubar kiojen Pushbant Palace five-star hotel-i melentsü shidangba CPI(M) aser Tipra Motha teloktemi magizükba sülen CM Saha-i iba osang metetdaksüogo.

Pushbant Palace ya Maharaja Birendra Kishore Manikya-i 1917 nung yanglu aser 2018 tashi Raj Bhavan ama benshia aru.

Pushbant Palace nung May 1941 nung Nobel prize angur Rabindranath Tagore arishi küm 80 ajungba benjung monga liasü.

Guwahati kübok tesem ana nung ganja seret 22.37 apu

Guwahati, February 9, 2025

(Agencies): Government Railway Police (GRP) aser Assam Police-i Guwahati nung tatalokba balala ana ana nung cannabis (ganja) seret 22.37 tashi ngutetogo aser iba dak sendakba nung nisung pezü apu.

Honibarnü GRP-i New Delhi Rajdhani Express nung

mita aodang passenger ana ket nungi ganja seret 17.8 angu. Nisung ana ya Sonu Mishra (29) aser Monoj Kumar (27) na ta jangjaogo aser tenaprang Ghazipur, Uttar Pradesh nungi lir.

GRP-i tena apu aser ozüng dak sendakba maparen inyaka odar.

Ano, Basistha Police Station aser Special Task Force (STF) külem telok kati Nalapara, Guwahati nung tesem ka mita aodang mozü shibelener ana-Akash Swargiary (25) aser Robert Basumatry (25) na apu.

Police-i tena ket nung ganja seret 4.57 ngutet aser mobile phones 3 den Rs. 5,800 apu.

India nung mezüngbuba Divyang University Assam nung lapoktsü

Guwahati, February 9, 2025

(Agencies): Assam sorkari Centre dang India nung mezüngbuba Divyang University lapoktsü mepishiogo, Ma t a m a b e n s a r t e m education, skill development, aser overall empowerment ajanga tashi itdaksütsü atema Assam nung iba University lapoktsü asüngdang.

Assam nung Social Justice and Empowerment Minister Pijush Hazarika-i Union Minister for Social Justice and Empowerment Virendra Kumar den senden ka amendang state sorkar tenüng nung iba temepishiba benok.

"Union Minister of Social Justice & Empowerment den ajurutepba atema pelar. Küna jembidang Prime Minister Narendra Modi lenisüba kübok Centre-i India nung mezüngbuba Divyang University Assam nung lapoktsü mepishiogo" ta Hazarika-i ashi.

Iba reju ajanga Divyangians tashi itdaksüba nung tongtipang shilem agitsü aser parnok nem specialized education aser skills training agütsüba ajanga linük yangerba nung shilem agitsü ta pai ashi.

Hazarika-isa Union Minister dang Pradhan Mantri Anusuchit

Jaati Abhyudaya Yojana (PM-AJAY) kübok Assam aser northeastern region nung hostel tem lapoktsü mepishi.

PM-AJAY scheme indang Central Advisory Committee (CAC) mezüngbuba senden nung Hazarika-i iba onük benoka lemsatep.

Union Minister Virendra Kumar-i onük ajak angaogo aser tarutsü nung jembitepa aotsü nangzük ta Hazarika-isa ashi.

Assam sorkari Divyangians nem maongka agütsütsü aser parnok nem shisaliok sayuba den taküm libaliroa aotsü atema bilemtsür.



February 9, 2025 nü Tripura Police-i Bagbasa nung nisung ka ket nungi Rs 2.50 crore shi alang Yaba süngjangtem bena ali apuba sülen agiba noksa ka angur. Tripura Police-i Mahindra Max gari ka soter mita aodang Yaba süngjang 50,000 bena aliba angu ta North District Superintendent of Police Avinash Rai-i ashi.

Israel sepaitem Netzarim nungi atsünginogo

Gaza City, Tsükali/February 9 (Agencies): Israel aser Hamas na taoba ita ceasefire benoktsü atema nangzüktepba kübok mezüngbuba shilem nung nüngdak aliba ama Israel military Gaza nung Netzarim Corridor nungi atsünginogo.

"Israel nunger sepaitemi parnok indang military post tem loksago aser tank tem Netzarim Corridor mesüra Salaheddin lenmang nungi atsünginogo aser iba ajanga anatsülen gari senzüsenpong sadem sadema kümogo, ta Hamas ketdangsür kati Deobarnü Salah al-Din Street tetshia ashi.

Netzarim Corridor ya ali tapak tila ka lir, koba ajanga northern Gaza ya tanungba Strip nungi piladaktsür. Ceasefire atema nangzüktepba kübok iba tesem toktsür aotsü atema tatembangbuba anogoji Feb-

ruary 9 liasü.

Israel aser Hamas na tepuokertem pongubenbuba melentepba sülen anogo ka lir Israel nunger sepaitem iba corridor nungi atsünginogo. Honibarnü tepuokertem melentepba mapang Hamas puri Israel nunger asem chiok aser Israel-i tepuokdak balala nung yua aliba Palestine nunger tepuoker 183 chiokogo.

Hamas-i sangdong ka ajanga ashiba agi, Israel nunger sepaitem iba corridor nungi atsünginba ajanga Palestine nunger samatsütsü asoshi Israel nunger nükjidong aliba takok mongutetba temaitsü sayur.

Hamas-isa, Palestine nungertem pei ki dangi meyipa aoba aser tepuokertem maneni melentepba ajanga IsraelAto Kilonser Benjamin Netanyahu-i teyazü jembiba

sayu, shibai ita 15 tsüngda takok angutsü ta shia liasü, ta ashi.

"Gaza ya nüburtem aser sepaitemi alangzükbba lima ka asütsü aser iba lima amakertem aser temalen nungi tashi balala agi menongshidaktsütsü," ta parokisa ashi.

Israel-i Gaza nung rara tenzükbba mapang iba corridor ya yanglua liasü. Iba tesem ya military zone ka lir, koba Gaza den Israel arrtsü nungi Mediterranean tzüyim tashi atsülanga aoer aser iba ya km 6 shi tesadem lir.

Iba corridor ya Netzarim tenüng nung jatsüogo, koba Gaza nung 2005 küm shibangba Israel indang settlement tatembangbuba liasü. Iba mapang Ato Kilonser Ariel Sharon-i Gaza nungi Israel nungertem atsüngintsü atema sentong yanglua liasü.

PTI leniri Pakistan sorkar den jembishinütsü tebilemba mali

Islamabad, Tsüklai/February 09 (Agencies): Tepuokdak yua alisang taoba ato kilonser Imran Khan-i tentetba Pakistan Tehreek-e-Insaf indang National Assembly nung Leader of Opposition Omar Ayub Khan-i party aser sorkar tsüngta jembishinü tenzüksütsü tebilemba maliba shiogo, ta Deobarnü sangdong ka ajanga ashi.

"Iba jembishinü indang chapter shibangogo," ta Ayub-i Geo News dang Honibarnü ashi.

Yimtenren tsütsü tangatettep kati arua jembishinütsüba ya tejangraba kisüng masü saka temulung agütsütsü nüngdaker, koba sorkari mesayuteter, ta Ayub-i ashi.

Coalition sorkari iba jembishinüba yimya aija jembidang, par party indang committee tangatetba tajung nung jembishinü tenzükbba, ta PTI lenir yagi ashi.

"Ajisüaka külen tsütsü aliri tebilemba tajung mesüra taginüba mesayutet, anungji tangatettep kati maruteti akum."

Ita ishika yimtenren tsütsü tensa mejungi arur December ita tatemlen PTI aser ruling government tsüngta asemlen ajurutepa senden menaka terenlok maliba ngua arur.

PTI yagi par takhangba

tem tezüluba nunga agüja lir, aser pezüben buba senden nung adentsü memulunger aser May 9 rongrongshirong asr November 2024 longkak aitiba bushisüngdangtsü atema sorkari judicial commission mekumteter ta ashi.

Iba sülen Khan'er party yagi longkak aittsü aser taoba küm general elections nung tim masüba mapa inyak ta tai tonglokja aliba anema longkak aittsü asoshi Honibarnü Khyber Pakhtunkhwa kübok Swabi City nung rally ayongzüka liasü.

National Assembly indang odongtar kati ashiba agi, ken o jembishinütsü atema Speaker Ayaz Sadiqi PTI balaka mejaok saka House nung kibur ka ama züngsem ajunga atema pa indang kishi lapoka lir ta dang ashi.

Ayub sangdong nung telangzüba agütsüdang odongtari ashiba agi, sorkar mesüra opposition-i meshi nung dang jembishinütsü atema tejaokba ya agütsütsü.

Speaker teinyaktsü ya ketdangsüa jembishinü südaktsütsü ya lir aser pa indang chamber aser par kidangi ozüng yanglur ajak otettsü, ta odongtari ashi.

Ano Ayub-i jembiba ama Pakistan Muslim League-Nawaz (PML-N) Senator

Irfan Siddiqui-ia sorkar indang negotiation committee ya "practically non-functional and ineffective" kumogo ta ashi.

Committee ya manentsü yonga joko mapa meinyaker, ta Siddiqui-i social media X nung ashi.

PTI-i par sasa jembishinüba nungi ainshiogo aser iba sülen Ato Kilonser Shehbaz Sharif-i ano par tangatetba melenshitsü asüngdangba magizük.


PTI ya longkak aitiba dangi meyipa aor, ta senator-i tai tongloksü aser party lenirtemi jembishinü nung shilem agitsü telemtetba agira sorkari lenmang asadangtsü, ta ashi.

Kasa mapang PTI Chairman Barrister Gohar Ali Khan-i sangdong ka nung taoba ato kilonser tepuokdak nungi chioktsü atema United States densema danga linüki teka amuoktsü bushir masü ta jangjashitsü.

"Khan chioktsü atema onoki US densema linük kata danga teyari memeshir. Pai shinga dena tezüngzüktep meyanglu aser meyanglutsü."

"Khan-ia shia ali ama, onoki tezüngzüktep ka atema jembir masü saka Pakistan aser democracy atema jembir," ta Gohar-i sangdong ka nung ashi.

Namibia mezüngbuba tir Sam süogo



Windhoek, Tsüklai/February 9 (Agencies): Sam Nujoma shibai apartheid South Africa nungi Namibia 1990 küm nüjiso dangi ania küm 15 tashi linük tir mapa inyaka liasü, pa arishi küm 95buba nung süogo.

Pa dang ya Namibia indang "founding father" ta ajar aser pa hopta asem linük yimtiba Windhoek nung mozükidang amungba sülen Honibar aonung asü, ta Namibia tir sangdong ka ajanga metetdaksü.

"Republic of Namibia tamendakdak anakshiogo," ta tir-i pa asüba indang Facebook ajanga sangdongba mapang ashi. Linük ajunga nung mang ayimtsü, ta kasa sangdong ajanga metetdaksü.

Germany kübok mapang talangka aliba aser South Africa den nüjiso atema kanga khukhua raraba mapang Nujoma-i par linük nüjiso

dangi ania liasü aser pa ya linük tebu ama züngshir.

Colonial mesüra temesüng nisungtem yimsüsüba nungi linük nüjiso dangi aniba Africa nunger lenirtem rongnung pa ya tatembangbuba lenir liasü. Lenirtem rongnung South Africa nung Nelson Mandela, Zimbabwe nung Robert Mugabe, Zambia nung Kenneth Kaunda aser Mozambique nung Samora Machel nunger densema lir.

Nujoma ya South West Africa People's Organisation (SWAPO) tekolakba liasü. Iba lokti tentet ya 1960 nung amenokba sülen parnok tekolak sür nüjiso atema inyaka liasü.

Nüjiso atema raraba mapang telemidang adokba aser South Africa-i kin balala dak ajemdaker linük lemdangtsüba sülen linük longjemshiba aser yanglushiba nung Nujoma-i tongtibang shilem agi ta shia Namibia nunger aikati pa nem tenüngsang agütsüogo.

Yimden yimsüsüba tsütsü pa anemertemia pa nem tenüngsang agütsüogo, shibai nüjiso anguba sülen temesüng nisung shishilembartem aser yimdenyimsüsürtem dena anisemer democratic constitution ka amenok liasü.

SÜR KÜM 1 AJUNGBA
MENUNGRA BILEMTETER

ASÜR TAJUNGLEMBBA TZÜDIR

Na medeni tanü küm ka ajunger, saka nü temeim, nü mapa tajungtem teti tatem makai onok meketa alitsü. Na kanga menungra bilemteter, Oba.

Nai teti meimbatem,
Kinungtsü, Jala-Jabasotem, Semchirtem,
Anükapang aser Kinunger Adianu

PUBLIC NOTICE
ICICI Bank Registered Office: ICICI Bank Tower, Near Chakli Circle, Old Padra Road, Vadodara- 390 007
Corporate Office: ICICI Bank Towers, Bandra-Kurla Complex Mumbai 400051
GOLD E-AUCTION CUM INVITATION NOTICE

Tsünglanglen shia aliba sen apua alir dang ICICI Bank Limited ("ICICI Bank") nungi gold ornaments melen sen apua lia menoktsü aiben metetdakja arur. Ajisüaka pamoki sen memonoktet nung onoki February 20, 2025 nü züngzüktepa aliba gold ornaments ya E-Auction asütsüsa akumer. Jelia osang magütsüi E-Auction anogo melentsü/account agentsü ICICI Bank dak tashii lir. Auction ya online - <https://jewel-auction.procuretiger.com> nung nikongdang 12:30 nungi 3:30 ako tsüngta agitsü. Terms and conditions tejangja atema agüja aliba website nung angutsü. Sen apua alir ya sür lira, conditions ajak senmanger dangi aotsü.

Loan A/C No.	Customer Name
Branch Name: Dimapur	
047662000951	Shyna Pepe
047662001173	Jayanta Saha

Date : 10.02.2025
Place : Dimapur

S/d Authorised Officer
For ICICI Bank Limited

Australia-i tanabuba Test asaya kokogo



Tsüklai/February 9, 2025 (Agencies): Galle nung tanabuba Test asaya nung Australia-i Sri Lanka wicket teku agi koka iba asayamung 2-0 agi kokogo.

Australia team-i tanabuba innings nung Sri Lanka nung wicket tatembangbuba ana agitsü atema minute 25 dang agi, aser parnok nem run 231 dang yangludakja liasü.

Iba sülen asaya akoktsü atema Australia team-i run 75 dang nungdaka liasü aser parnoki lunch masü tsüngda opener Travis Head (20) dang out sür asaya koka liasü. Parnoki mezüngbuba Test-innings ka aser run 242 agi koker liasü.

Asaya nung Usman

Khawaja-i out mesüi run 27 aser Marnus Labuschagne-ia out mesüi run 26 yanglua liasü. Sri Lanka nung batter Dimuth Karnuaratne-i pa asoshi Test 100buba aser SL tenünung nungi tatembangbuba asayaba mapang tatembangbuba over ona liasü.

Iba asayamung akokba sülen Australia team-i 2011 küm sülen tang mezüngbuba Sri Lanka nung asayamung ka kokogo.

"Onoki tetenzük nungi kanga junga asaya," ta iba asayamung atema Australia captain Steve Smith-i ashi, shibai mezüngbuba Test nung run 141 yangluba sülen tanabuba Test mezüngbuba innings nunga run

131 yanglua liasü.

"Batter temi sentong tajung yanglur arua idaki conditions adopt süteta asayaba ya jangrademtsüka lir.

"Onok bowler tem ajaki kanga junga asayar ama bilemer," ta pai ashi.

Iba asaya ya 2023-25 World Test Championship cycle nung league phase tatembangbuba asaya liasü.

Australia team June ita Lord's nung final asayatsü asoshi jenjang ka ngutetogo, kong parnok South Africa den asayatsü, shirnok temaba jenjang nung tembangogo. Sri Lanka team-a iba cycle nung England sülen trokbuba nung tembangogo.

"Kidang asayamung 2-0 agi makokba ya tezüdangtsüka," ta Sri Lanka captain Dhananjaya de Silva-i ashi. "Conditions onok atema kanga tapet liasü," ta paisa shisem.

"Mezüngbuba asaya nungi asaya amokbanger asayatsü atema onoki maongka monguteti liasü aser Australia team-i parnok kechiba final atong iba indang kuli agütsüogo," ta paisa shisem.

Sindhu BAMTC 2025 nung masayatsü

Tsüklai/February 9, 2025 (Agencies): India tsürtem rongnungi nüngtugu badminton asayar PV Sindhu-i la the 2025 Badminton Asia Mixed Team Championships (BAMTC) nung masayatetsü ta shiogo. La kibong akümba sülen iba asayamung nung mezüng asayatsü liasü saka ano atsülangshiogo.

Olympics nung medal ana tashi ngur alila yagi iba telemtetba agiba ya social media ajanga jangjashitsüogo aser Deobarnü ashiba agi, la Guwahati nung February 4 nü training mapang hamstring yiruba ajanga masayatetsüsa kümogo.

"Temulung kanga korema ni BAMTC 2025 atema team den maotsü telemtetba agiba lemsateper. Guwahati nung February 4 nü training agiba mapang ni hamstring yirua liasü. Linük atema ni kanga merandangogo, ajisüaka MRI agiba sülen taneptsü angutsü atema ni imlaba dang nungi mapang talangba agitsü jangjaogo. Team-i iba asayamung nung junga asayatsü imlaja atar aser tezülen nungi team

pusemstsü," ta Sindhu-i X nung zülutsü.

La masayatetsüsa akümba ya India team asoshi takoksa tulu lir, shirnok tang National Centre of Excellence in Guwahati nung training agidar.

Team nung temaba jenajang nung asayar Lakshya Sen, HS Prannoy, aser tarep asayar Satwiksairaj Rankireddy aser Chirag Shetty nung densema lir. India team-i taoba BAMTC nung bronze medal ngua liasü.

Taküm iba asayamung atema India team Group D nung 2023 runners-up South Korea aser Macau den ata lir.

Sindhu ya Hyderabad nung amendaker aliba shishilembar Venkata Datta Sai den Rajasthan indang luxurious Raffles Udaipur Resort nung kibong akümba sülen hopta ishika dang lir la tang iba asayamung nung masayatsü atema telemtetba agiogo.

Kibong akümba sentong nung tembartem aser kinungertem dang jaoka munga la taküm nung tapak tasen ka lapokogo.

FA Cup: Brighton aser Newcastle nati takok angu



Tsüklai/February 9, 2025 (Agencies): Honibarnü FA Cup round pezübuba nung Brighton nungi asayar Kaoru Mitoma-i goal tajung ka idakja parnoki goal 2-1 agi Chelsea tsükdaktsüogo aser kasa mapang nung Manchester City-a 2-1 agi third-tier Leyton Orient kokogo.

2018 küm FA Cup akokba sülen tang tashi Chelsea-i takok marok ka danga koka mali aser takok asoshi ano season ka atatsüsa akümstsü.

Asaya tenzüker minute pongububa nung Cole Palmer-i cross asüba ball ka Brighton keeper Bart Verbruggen-i pupeter yokba sülen Chelsea team tejakdang

aküm.

Ajisüaka mapang tatsüka dang lir minute 12buba nung Joel Veltman-i cross asüba ball ka Georginio Rutter-i Chelsea defender Trevoh Chalobah aser Tosin Adarabioyo na yongtsü nung tongokja goal kasasa aküm.

Iba sülen asaya tanabuba shilem nung minute 57buba nung Mitoma-i Chelsea keeper Robert Sanchez adena goal ka idakja parnoki asaya 2-1 agi akok.

Brisbane Road nung Manchester City aser Orient na asayaba mapang Jamie Donley-i metsüba ball bar nung ondaker alua City goal-keeper Stefan Ortega dak

ondaker aiba sülen Orient pur goal 1 agi tejakdang aküm.

Asaya tanabuba shilem nung Uzbekistan defender Abdukodir Khusanov-i minute 56buba nung City atema goal ka idaktsü aser iba sülen asaya atemtsü minute 11 anunga lia De Bruyne-i tanabuba goal idakja parnoki asaya akok.

Kasa asayamung nungsa St Andrew's nung Newcastle-i asaya mekoki aliba nungi meyiper goal 3-2 agi Birmingham kokogo.

Asaya nung mezüngbuba goal ya Birmingham atema Ethan Laird-i second 42buba nung idaktsü.

Ajisüaka Joe Willock aser Callum Wilson nati goal kaka idaktsüba sülen parnok tejakdang aküm saka ano Birmingham atema Tomoki Iwata-i tanabuba goal idakja goal kasasa nung asaya mezüngbuba shilem tembanga liasü.

Team ana tsüngda kanga toktepa asayaba sülen minute 82buba nung Newcastle atema Willock-i tasembuba goal idakja parnoki asaya akok.

SA Champions Trophy squad nung Bosch-i Nortje melenogo

Tsüklai/February 9, 2025 (Agencies): Iba ita tatemlen asayatsü aliba ICC Champions Trophy atema South Africa team nung Anrich Nortje meleno Corbin Bosch shimba sangdongogo.

Nortje teberem yiruba sütetba ajanga masayatetsüsa kümogo. Pa taoba ita nungi masayai arudar.

Arishi küm 30 tain Bosch, linük team nungi mezüngbuba taoba küm December ita asaya liasü aser pa ODI ka nung dang asayar lir. Iba asaya nung pai run 40 yanglu aser wicket ka agia liasü.

Iba den bendenloksema South Africa-i, fast bowler Kwena Maphaka traveling reserve ama team nung züngoksemogo. Bosch aser Maphaka na den batter Tony de Zorzi nung tang asaya aliba ODI asayamung atema

team den longjemtsü asoshi Pakistan-i Deobarnü ogo.

Taoba ita Cricket South Africa (CSA)-i, Champions Trophy nung asayatetsüsa Nortje taneptsü ngur malitsü ta shir liasü. Iba asayamung ya February 19 nü nungi tenzüka Pakistan aser Dubai na nung asayatsü.

Nortje ya 2023 kuma teberem yiruba ajanga India nung asayaba Cricket World Cup nung masayateti liasü.

Arishi küm 31 tain Nortje ya pa indang pace, bounce, aser variations atema kanga nüngtugu lir aser pa South Africa indang white-ball setup nung kanga tongtiban asayar ka kümogo.

Pai ODI 22 nung wicket 36 aser T20I 42 nung wicket 53 agir lir. Pa tatemsa ODI nung asayabaji ita 15 tejakdang Bloemfontein nung Australia den asayaba liasü.

BILEMDANGANG

"Nüsasa na memeimra tangar koma meimtsü."